

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-248/14  
Sarajevo, 27.2.2014. godine

**Z A P I S N I K**  
**20. VANREDNE SJEDNICE DOMA NARODA PARLAMENTA FEDERACIJE**  
**BOSNE I HERCEGOVINE, održane 27. februara 2014. godine**

Sjednica je počela u 11.31.

Sjednici je predsjedavao Tomislav Martinović, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio delegate.

Izostanak sa sjednice opravdali su Drago Puzigaća, Daliborka Milović i Slaviša Mihajlović.

Na osnovu evidencije Stručne službe, predsjedavajući je konstatovao da sjednici prisustvuje 38 delegata, što čini većinu, te Dom naroda može raditi i punovažno odlučivati.

Predsjedavajući je podsjetio delegate da Dom naroda može, prema odredbi člana 85. Poslovnika o radu Doma naroda Parlamenta Federacije, sazvati sjednicu i u roku kraćem od 10 dana a dnevni red predložiti i na samoj sjednici.

Predsjedavajući je upitao delegate imaju li prijedloge za izmjenu i dopunu dnevnog reda.

Dževad Rađo je predložio da se u dnevni red uvrste sljedeće tačke:

1. Podnošenje neopozive ostavke Vlade Federacije Bosne i Hercegovine,
2. Zahtjev predsjedniku Federacije da po hitnom postupku u parlamentarnu proceduru uputi Zakon o amnestiranju svih učesnika demonstracija, osim u slučajevima pojedinaca za koje se dokaže da su lično vršili uništavanje i paljenje imovine,
3. Informacija o stanju sigurnosti na području Federacije Bosne i Hercegovine s posebnim osvrtom na proteste građana u periodu od 05.02. do 20.02.2014. godine.

Predsjedavajući je stavio na glasanje prijedlog Dževada Rađe za izmjenu i dopunu dnevnog reda i konstatovao da nije dobio potrebnu većinu glasova (dva delegata za, 14 delegata uzdržano i 23 delegata protiv).

Potom je predsjedavajući stavio na glasanje prijedlog Kolegija Doma naroda te, na osnovu rezultata glasanja, konstatovao da je Dom naroda Parlamenta Federacije Bosne i Hercegovine, sa 38 glasova za, uz jedan uzdržani glas i uz jedan glas protiv, usvojio sljedeći:

## DNEVNI RED

### 1. Razmatranje stanja sigurnosti na području Federacije Bosne i Hercegovine u kontekstu javnih protesta građana u periodu od 05.02. do 20.02.2014. godine.

Predstavnički dom Parlamenta Federacije Bosne i Hercegovine je na 22. vanrednoj sjednici, održanoj 25. i 26.02.2014. godine, razmatrao stanje sigurnosti na području Federacije Bosne i Hercegovine u kontekstu javnih protesta građana u periodu od 05.02. do 22.02.2014. godine i tom prilikom usvojio zaključke.

Predsjedavajući je obavijestio delegate da će im na klupe biti dostavljena Informacija Federalne uprave policije o stanju sigurnosti na području Federacije Bosne i Hercegovine u kontekstu javnih protesta građana sa koje je skinuta oznaka povjerljivosti.

Informaciju o stanju sigurnosti na području Federacije Bosne i Hercegovine u kontekstu javnih protesta građana u periodu od 05.02. do 20.02.2014. godine obrazložili su federalni ministar unutrašnjih poslova Predrag Kurteš i direktor Federalne uprave policije Dragan Lukač. Zamjenik premijera Federacije Bosne i Hercegovine federalni ministar prostornog uređenja Desnica Radivojević je obrazložio stav premijera Federacije Nermina Nikšića, koji je bio spriječen prisustvovati sjednici, te je iznio prioritete Vlade Federacije u narednom periodu.

U raspravi su učestvovali: predsjednica Kluba delegata srpskog naroda Mira Ljubijankić, predsjednik Kluba delegata hrvatskog naroda Luka Faletar, u ime Kluba delegata bošnjačkog naroda Jasenko Tufekčić, Damir Čardžić, Esad Bašagić, Predrag Kojović, Ivo Tadić, Sretko Radišić, Josip Perić, Esed Radeljaš, Zijat Mušić, Aner Žuljević, Elvira Abdić- Jelenović, Branislav Crnogorac, Mirko Batinić, Tomislav Martinović i Ivo Divković.

Izvještaj Komisije za sigurnost Doma naroda obrazložio je Esad Bašagić, predsjednik Komisije. Komisija je pored zaključaka usvojenih u Predstavničkom domu Parlamenta Federacije Bosne i Hercegovine, Domu naroda predložila i sljedeći:

### ZAKLJUČAK

Komisija za sigurnost Doma naroda Parlamenta Federacije Bosne i Hercegovine daje punu podršku svim policijskim i sigurnosnim agencijama da u skladu sa zakonom primjene svoje ovlasti radi zaštite ustavnog i demokratskog poretka, sigurnosti građana i imovine.

Komisija traži od Vlade Federacije da pripremi i u parlamentarnu proceduru uputi dopunu Zakona o unutrašnjim poslovima Federacije Bosne i Hercegovine.

Nakon rasprave predsjedavajući je podsjetio delegate da je Kolegij Doma naroda prihvatio zaključke Predstavničkog doma i predložio da ih Dom naroda usvoji. Predsjedavajući je izjavio da ne treba proširivati Zaključke Predstavničkog doma zaključkom Komisije za sigurnost Doma naroda, budući da su oni jednim dijelom sadržani u općoj definiciji ovih zaključaka.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 41 glasom za i uz jedan uzdržani glas, usvojio sljedeće:

## ZAKLJUČKE

1. Očuvanje ustavnog i demokratskog poretka, sigurnost građana i imovine treba biti glavni prioritet djelovanja svih institucija, medija i pojedinaca.
2. Potrebno je osigurati ustavno pravo na mirne proteste, ali i osigurati funkcioniranje svih institucija i javnih službi uključujući neometano odvijanje saobraćaja.
3. Zadužuje se Ministarstvo unutrašnjih poslova Federacije Bosne i Hercegovine da sačini analizu funkcioniranja policijskih struktura i utvrdi odgovornost rukovodilaca zbog propusta u provođenju zakona, te predloži efikasan mehanizam koji će jasno definirati nadležnosti i odgovornosti.
4. Istrajati na otkrivanju počinitelja i organizatora počinjenja krivičnih djela tokom protesta i na efikasnom procesuiranju.
5. Dom naroda Parlamenta Federacije Bosne i Hercegovine zahtijeva od tužilaštava u Federaciji Bosne i Hercegovine i Bosni i Hercegovini da prioritarno procesuiraju sve predmete koji se odnose na privatizacijski i opći privredni kriminal, te korupciju, a od sudskih organa traži da efikasno rješavaju ove predmete u skladu sa zakonima i javnim interesom i da informiraju Dom naroda o poduzetim aktivnostima.
6. Dom naroda Parlamenta Federacije Bosne i Hercegovine obavezuje se da će u narednom periodu prioritarno raditi na zakonskoj regulativi u oblasti primanja i naknada u ukupnom javnom sektoru, u oblasti socijalne politike, ekonomije, sigurnosti s fokusom na izmjene zakonske regulative radi poboljšanja položaja građana, efikasnosti i odgovornosti institucija javne vlasti. Nalaže se Vladi Federacije Bosne i Hercegovine da pripremi odgovarajuće prijedloge zakona i druge akte iz navedenih oblasti.

Sjednica je završena u 15:04.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALAČI

Tomislav Martinović